

# Ղոսսիկն

արվեստի հանդես | # 1(7), 2023





# ԷՂՈՒԱՐԴ ԻՍԱԲԵԿՅԱՆԻ ԳՐԱՖԻԿԱԿԱՆ ԱՇԽԱՏԱՆՔՆԵՐԸ



— Օլյաննա Քարամյան  
արվեստաբան

Մտապատրանքի փոթորկում, տեսիլքներ, իրականի և անիրականի միախառնում, երազների մեջ երկխոսություն... Պատգամ, պատմության դրոշմներ ու խորաթափանց միտք... Պատկեր պատկերի ներսում կամ թվացյալ տարածություն սահմաններից դուրս, անվերջ հասունացող նոր տեսարաններ... Գիծ, գույն, աներանգ տարածություն, բայց և անչափ գունեղ... Հույզեր, կիրք, սպասում, շշուկի աղմուկ լռության մեջ և զգացմունքների համատարած պողոթկում:

Էղուարդ Իսաբեկյանի կերպարները ճանաչում են հազարների միջից, առանձնացնում և անհատական վերաբերմունք ձևավորում. յուրաքանչյուր պատկեր ունի իր պատմությունն ու կուլմինացիան: Նրա գծանկարները առանձնանում են իրենց ռոմանտիկ հուզականությամբ, որտեղ հստակ երևում է արվեստագետի հախուռն բնավորությունը, սերը կյանքի նկատմամբ՝ բնության և շրջապատող աշխարհի անհորիզոն ընկալումներով: Նրա գծանկարչական ռիթմերն այնքան խոսուն են, այնքան իրական, որ այն,



ինչ չես տեսնի աչքերով, նա ներկայացնում է շատ ավելի հուզական լեզվով և իր գծով արտահայտում է մարդկային հավերժական արժեքներն ու ապրումները: Նկարիչը լավ ծանոթ է կյանքի դառնությունների տարածն շերտերին և մարդկային բնավորության խորություններին. ետ մղելով նյութական արժեքները՝ արվեստի միջոցով նա բացահայտում է ոգեղենի կարևորությունը: Եվ դա է պատճառը, որ նրա կերպարները համամարդկային են, ազատ ու անկաշկանդ և ունեն յուրատեսակ խորհրդավորություն ու երազանքներ: Իսաբեկյանի աշխարհը իր հոգու արձագանքն է, որտեղ ապրում են և՛ պատմական, և՛ իրական անհատներ: Նկարիչը ճանաչում է իր զգացածի կարևորությունը և մեծ վարպետությամբ դիտողին է փոխանցում իր «մոնոլոգը»:

Էղուարդ Իսաբեկյանի ստեղծագործությունները իսկապես մեկուսի աշխարհներ են՝ և՛ կազմությամբ, և՛ պատկերառոճով, և՛ գունային սիմֆոնիայով: Նրա գրաֆիկայի թեմատիկան բազմաբովանդակ է. հայ-





Իրիկնամուտին. 1994, թուղթ,  
խառը տեխնիկա, 40x56, ընտանիքի հավաքածու



Ինքնադիմանկար. 1974, թուղթ, ածուխ,  
սանգինա, 59x41, ընտանիքի հավաքածու

րենի պատմության էջեր, դիցաբանություն, գրական գեղարվեստական երկերի նկարագարումներ, դիմանկարներ... երազներ, կանայք, զգացմունքների հարատև գունապնակ, բնության տարերքներ: Նկարիչը աշխատել է գրաֆիկական գրեթե բոլոր նյութերով՝ մատիտ, թանաք, սանգինա, կավճամատիտ, ֆլումաստեր, ածուխ՝ ամենուրեք թողնելով գծի, ռիթմի և ձևի ուրույն ձեռագիր:

Իր կյանքի վերջին տարիներին, երբ կորցրել է տեսողությունը, նկարիչը չի դադարել ստեղծագործել և նկարել է մինչև իր կյանքի մայրամուտը: 2022 թ. նոյեմբերի 4-ին բացվեց արվեստագետի գրաֆիկական աշխատանքների ցուցահանդեսն Էդուարդ Իսաբեկյանի ցուցասրահում:

Էդուարդ Իսաբեկյանը 20-րդ դարի հայ արվեստի պատմության անքակտելի մասն է, մի ամբողջ դարաշրջանի լուռ վկայությունը, երբեք չընդհատվող գիծը:



Ալիսան գժվեց. 1994, թուղթ, պաստել,  
57x40, ընտանիքի հավաքածու